

INUIT ATAQATIGIIT

Inatsisartuni



UKA2019/150
8. oktober 2019
Sofia Geisler

Kalaallit Nunaanni pinerluttulerinermi inatsisip allanngortinneqarnera pillugu siunnersuummut missingiut pillugu Namminersorlutik Oqartussat akuersissuteqarnissaat pillugu inatsisartut aalajangiiffigisassaattut siunnersuut (Illoqarfimmi illuliorfiusimasumi illuinnarsuutinik eqqunngitsumik iginnerup pinerluutinngortinneqarnera, takunnissimasunik illersuinerup annertusinera, inip nakkutilliiffiusup atorneranut piumasaqaatinik iluarsineq il.il.) (Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Aalajangiiffigisassatut Naalakkersuisut siunnersuutaat tallimaasut uuma iluaniittut Inuit Ataqatigiinniit tapersersorpagut, ataaserlu pillugu apeqqut ataaseq erseqqissaatigeqqulaagarput naggataatigut ilanngutissavara.

Inoqarfiit iluanni illuliorfigisimasumi aallaasinik eqqunngitsumik iginnerup pinerluutinngortinneqarnissaanik siunnersuut inissaminiippoq. Akiliisinneqarnissamik malitseqartinneqaannartarnera taamaasilluni qimanneqassaaq, pinerluttulerinermilu inatsit naapertorlugu pineqaatissiinissamut aalajangersaaneq pialissalluni. Sanaartukkaniit 500 meterit iluanni pissusissaanngitsumik seqqorneq sunaluunniit unioqqutitsineruvoq imaannaanngitsoq, inuppassuarni toqqissiviilliornermik pilersitsisartog. Maluginiarparput siunnersuummi pineqanngimmata illuaqqap illuaqqaallunniit piniariarfiusisartut eqqaat.

Kalaallit Nunaanni takunnissimasut inatsisitigut illersugaannginnertik pissutigalugu unnerluutigineqartumut sassarnissartik qunugisarmassuk, takunnissimasunik nalinginnaasumik siorasaarinerit pinerluutinngortinneqarnissaat inatsisissatut siunnersuutaasoq aamma tapersersorparput. Taamaasilluni inuup naatsorsuutigineqartumik politiiunut imaluunniit eqqartuussivimmut nassuiaanissaani imaluunniit nassuiaareernerani ajortumik pineqarnissamik siorasaarisoqartillugu aalajangersagaq atugassatut naatsorsuutigineqartoq taperserlutigu.

Tarnimikkut naaparsimasut pineqaatissinneqartillugit inissinneqartarnerannut katsorsarneqartarnerannullu kiisalu tarnimikkut innarluutillit pineqaatissinneqartillugu inissinneqartarnerannut inatsisitigut kikkut akisussaasuunersut pillugit Naalakkersuisut siunnersuuteqarput. Takusinnaavarput tarnimikkut nappaatillit inissinneqaneranni pineqaatissiinnerup kingorna isumaginninnermut akisussaasut tamatumunnga ingerlatsisuusarsimasut, apeqqutigerusunnarporlu tamatuma malitsigisaanik isumaginninnermut akisussaasut isumaginnittarnerat aningaasanik sulisussanillu malitseqartinneqartarnerasoq, taamaasilluni tarnimikkut innarluutillit pisinnaatitaaffii qulakkeerneqarsinnaaqqullugit. Naalakkersuisut tamanna akisinnaanerpaa?

Taamatut oqareerluta siunnersuut una ataatsimiititaliamut attuumassuteqartumut ingerlaqqittussatut innersuupparput.